



Am Bàrd—An t-Urr. Cailean MacCoinnich—aig a' Mhòd
am Baile Bhòid. (Daily Record)

Tir nan Og

le

CAILEAN T. MACCOINNICH

*Cian thar an t-sléibh 's ri cois na h-aibhne àlainn
Thar nam beann àrdghorm, sìos ri taobh a' chaoil,
'S ri balbh-chrith ghaoth 's ri gréin 'na laigh an sàmhchar—
Eilean fo sheun a' chuain 's fo chulaidh fhraoich.*

*Is fad an ròd nuair bhios an tràth a' ciaradh
Tha reultan soluis toirt dhomh cuiridh 's fàilt';
An t-anmoch binn le guth nan eun 's an lìonaidh
Is sruthan ruith gu uchd a' chuain le gair.*

*Mac-talla freagairt fuaime an guth 's gach seòmar,
Is ceum an cas a' teachd o mhuir 's o bheinn—
A' chuideachd ghasd' tha cruinn an sin ri ceòlraidh,
Le sgeula gaisgeachd, fìon, is dàin 'gan seinn,*

*A' lorg air beucadh tuinn 's air monadh ùdlaidh
An ceum nach siubhail ach na suinn as feàrr;
'S troimh thoirm nan dùl thig mis' thoirt fàilt' is àmhlachd
Do an cheann-fheadhn', is suidhidh mi 'nam àit.*